

春在堂金書

第十二冊

春在堂稌文六編六

德清俞樾

浙江補用道陸君墓誌銘

君諱同壽字敏貽號介眉姓陸氏吳巨族也在前明有諱雄者始卜居吳江之東門爲吳江人少國朝分吳江地置震澤縣遂爲震澤人乾隆時有以博學鴻詞徵者諱桂馨君之五世祖也高祖昌言縣學生曾祖泰增乾隆四十二年舉人安徽廣德州學正祖瑩縣學生三代並以君父官贈榮祿大夫高祖妣張氏金氏曾祖妣陳祖妣張皆一品夫人父諱迺普國學生以軍功起家

歷署河南懷慶府知府陝州直隸州知州兩署安徽安
廬滁和道以道員記名簡放加布政使銜賞戴花
翎附祀英果敏公祠誥授榮祿大夫母張氏封一
品夫人君生而嚴重不苟言笑年十三能爲文里中文
課輒冠其曹尤工爲五七言詩在京師時頗爲諸名士
所推服時粵寇已起海內多故君自惟少時應府試曾
取第二咸豐十一年應京兆試亦曾取謄錄使吾命應
以科第進詎不能游於庠舉於鄉乎中原俶擾之秋正
丈夫激發之日勉盡忠孝而已何藉科第爲遂投効河
南軍營以異常出力奏保以知州發浙江補用尋又

赴安徽大營從攻張寨瓦店克之有詔賜戴花翎巡撫喬勤恪公語之曰昔史遷言留侯狀貌不稱其志氣今子一文弱書生而曉暢戎機諸宿將皆不能及然則以貌取人不又將失子乎軍務平始赴浙浙中大吏咸知其才有事必以屬君如解餉如發審如保甲如釐捐君任其事事無不舉於時盜賊潛蹤商民稱便焉其在讞局也手決獄大小數百事不刑一人案情悉得尤人所難云秦隴軍興以君素知兵提督金公調赴前敵秦中礮瘠之區徑路崎嶇冰雪凝沍君不敢自逸匹馬往來黃沙白草之間雖勞苦成疾而意氣彌奮從大軍蕩

平金積堡老巢追勦烏拉特旗逸寇君功居多又兼理
精臺千緒萬端豪釐無爽脂膏之中不以自潤古稱廉
能君兼之矣事平敘功先保知府仍留原省洊保道員
賜二品頂戴光緒七年春浙江金衢嚴道缺員君以
次應補是缺而母張夫人卒遂以憂歸其時榮祿公先
已謝病里居以震澤舊廬燬於兵火僑寓郡城君隨侍
焉君閱歷仕途垂二十年中興諸名臣如左文襄李文
忠喬勤恪英果敏諸公皆以君年富才優處事明決交
章論薦使君得盡其才則節鉞封疆指顧閒耳而君以
榮祿公年高壹意以色養爲事凡修祖墓建義莊立宗

祠刊族譜榮祿公所欲爲者咸贊成之又於宅之東偏
闢一小圃疊石蒔花奉榮祿公游息其中是名半園君
晚年號半園灌叟以此也榮祿公卒君年已五十一哀
毀若孺子然於所常居之書室每逢朔望焚香展謁摩
娑遺物泣下沾襟皖省以榮祿公政績上聞 詔附祀
英果敏公祠君手奉栗主躬送入祠其容蹙蹙感動行
路蓋天性純孝有如此而仕進之意則自此絕矣君投
筆從戎其勞勩有非人所能堪者事後絕口不言後陳
舫仙方伯爲蘇臬使與君共事軍中者也每至君家輒
追話金積堡舊事其危險萬狀家人乃始稍稍聞之然

所不聞者多矣居鄉不謁達官不預公事惟以文史自娛每招致名流集爲文社以勸課其諸子編刻八世祖諱文衡歿祀鄉賢祠者所著嗇庵隨筆及先德錄傳家集諸書以授其子曰守此足矣君以積勞之身又素有欬疾年逾六十繼以喘疾時劇時瘥浸至不起疾篤語諸子曰吾生平無疾言厲色從不以意氣凌人雖賊獲輩不輕呵斥自奉不敢奢待人不取嗇此吾以汝祖爲法也願汝曹亦法吾而已光緒二十七年二月甲辰啟手足於正寢年六十有四君天性和易好善不倦值國事多艱前後輸助無慮數萬易簣之前猶念秦隴奇

荒曰此吾從軍故地今又行在也敢秦越視乎命其
子集巨貲振之由浙彙解浙撫疏聞詔以樂善好施
旌其門至其平時周恤鄉里贍養親族待以舉火者數
十家病施藥暑施茶歲以爲常猶其小節矣妻元聘費
元配沈均贈一品夫人再娶丁封一品夫人側室三方
氏以子官封恭人子四懷鼎鼎奎鼎鼎華廷鼎鼎存者二鼎
奎丁夫人出增貢生浙江候補知府特旨以道員用
賞戴花翎鼎鼎華方恭人出附貢生安徽候補直隸州
捐加三品銜分省試用道女五殤者一常熟曾愷章元
和潘誦鎮長洲彭疇士其壻也順天大興陳鹿儕則其

第三女許嫁之壻未及嫁而女卒者也孫增培孫女三
某年月某甲子鼎奎鼎華敬營窀穸於某原礪石乞銘
銘曰

君承門蔭起家戎馬轉戰皖豫依然儒雅秦隴之間道
路孔艱匹馬而去凱歌而還戔戔廉車莅臨浙水折獄
理財政聲大起俄拋仕版歸奉高堂半園風月終身徜
徉耆壽甫臻春輝頓逝君子之澤長流百世我銘其墓
我言有徵佳城蔥鬱子孫其興

江蘇候補道馮君墓誌銘

君諱邦棟字杰卿馮氏湖南衡陽人祖杏圃父升漳以

名諸生久困場屋齋志以終君少有大志喜讀經世書
不屑爲舉子業又鑒於其父遂不應有司試咸豐四年
曾文正公義師起君稟命於母黃太夫人投筆從戎以
從九品赴江西幫辦營務統帶礮船克吉安縣保升縣
丞旋奉調入曾忠襄公幕中克景德鎮克浮梁縣皆有
功文正詔以通判遇缺卽選賜戴藍翎又敘收復黟縣
諸城功加五品銜及安慶省城復文正奏設大勝關釐局以君主其事官
留安徽補用文正奏設大勝關釐局以君主其事官
軍解雨花臺圍君與有力焉升知府金陵平大功成
詔以道員交軍機處記名遇缺簡放時有旨祭明陵

君以道員陪祭焉自從曾文正東征十年以來崎嶇戎馬不遑將母至是始乞假歸拜黃太夫人於堂下戚黨榮之會曾文襄公撫鄂奏請以君辦營務及一切善後事捻寇南犯是防是勦雲夢應城天門諸縣次第收復文襄疏言君屢著戰功謀勇兼裕請給予二品封典從之俄左文襄公經畧陝甘亦以君久經戰事調營差遣君至未及一年黃太夫人卒於家君方總理營務請歸守制文襄以邊事孔亟諷以古人金革毋避之義乃勉以墨經從事時花門一種已就撫於河洲餘眾猶持兩端君單騎渡河賊皆下馬羅拜惟僞總兵馬本源僞

知府馬桂源仍擁眾不降君恩威並用數月之內往返
數次卒帖服之回事大定請建設州縣創立學校增置
參游以經久遠文襄韙之乃言於朝謂君辦理妥協請
加按察使銜并準其回籍葬親以符定制君先曾平反
噶爾驪及青海巨案回民皆稱活佛故啟行之日僧番
土回皆爇香跪送數千里不絕私設長生之位奉之於
家君葬親事竣家居不出光緒九年 詔下湘撫問君
行止彭剛直公力勸入都適左忠襄復出督兩江乃奏
調南洋差委并請留江蘇補用君至江甯凡要事悉以
委之以一身任數事在君固應之有餘而忌者側目矣

文襄薨繼之者興化劉公給咨送部引見 朝廷眷念

前勞 諭樞臣仍遇缺簡放君方擬具摺謝 恩而鐫

級之 命下矣一時愕眙莫測所由不知興化公彈章

已先日至也聞者咸爲不平君夷然曰吾以布衣遭時

竊位得至監司分已極矣復何求乎卽日南歸遂不復

出君事親孝處宗族以敦睦待親友以謙厚訓子姪以

嚴正鄉里閭爭一言立解水旱偏災無不力振施衣施

粥歲以爲常若蓮湖書院若花藥寺若楊泗廟凡有工

作莫不歛之使成蓋好義樂善其天性也積勞軍旅元

氣大虧光緒二十八年五月十日己巳卒於家年七十

有七妻蔣夫人先卒子灼孝縣學生同知銜廣東候補
知縣歷署儋州連平州化州知州臨高縣始興縣知縣
先君一月卒燂孝縣學生同知銜分省補用知縣雍臣
縣學生五品銜湖北補用府經歷亦於七年前先君卒
孫四長者筠五品銜廣東補用鹽經歷次友垚友坻友
堅光緒二十九年二月丙申卜葬金鳳山之陽幽宅旣
寔貞石斯刊君家在衡州府江東岸彭剛直公其比鄰
也故其孤介彭氏寓書乞銘余惜君之才未竟其用又
念與剛直有袍釋之義故不以衰病辭比其事綴以銘

銘曰

崎嶇戎馬轉戰南北斬將搃旗元戎動色飛書敘功優
詔進秩蠶茲回民亦感其德不呼以官尊之曰佛以君
之才宜拜節鉞眾嫉蛾眉誰憐駿骨歸來故鄉蕭然巾
幘未竟其才千秋太息鬱鬱佳城我銘其穴勒鼎銘鐘
請俟異日

故泰興縣知縣張君墓誌銘

君諱興詩字子持一字恕齋張氏本橫渠先生之後世
居關中宋寶祐間有諱曰明者以討賊死吳越間遂家
餘杭其子和又自餘杭遷歸安遂爲浙江歸安人曾祖
諱春苞以子師誠官福建巡撫封榮祿大夫祖諱彭

候選鹽大使父諱應恆直隸候補知縣平泉州州判並
以君官累 贈通奉大夫曾祖妣沈氏王氏皆封一
品夫人祖妣趙妣吳皆累 贈夫人君四歲而孤昆弟
五人自奮於學道光二十四年入邑庠咸豐元年與其
兄懋齋君同舉於鄉公車入京居其從兄惕齋君所惕
齋由詞林官臺諫所與游皆魁士名人而沈文節公爲
君座師又延君館其家一時鉅公如文文端彭文敬羅
椒生趙蓉舫尙書殷譜經侍郎皆折行輩交於君以經
世之學相礪礪咸豐三年考取景山官學教習期滿選
授泰興縣知縣同治元年七月之官是時粵寇方踞金

陵東南糜爛泰興地濱大江其南岸武進丹陽諸縣寇蹤出沒靡常鹽梟劇盜所在充斥君設厰以撫難民練團以遏賊北竄緝獲梟盜首領悉置之法境內又安俄而有齎匪之獄株連甚眾君察其人皆愚夫婦惑於禍福無逆謀言於漕帥吳公誅其渠三人餘悉縱去又親至鄉間勸誠聚散民皆感泣明年以病乞歸旋丁吳太夫人憂服闋到省歷主釐局東捻肅清李文忠公敘君籌餉功奏保以直隸州在任候補十二年坐補泰興縣民聞君至歡迎於塗乃舉曩所未及設施者次第行之繕城垣樹敵樓濬濠河葺公廨治囹圄以農爲生民之